

## Carta ki'na nuu n-kidava'a Spalu nuu ñayiu Tesalónica

### *Kidava'a Spalu nuu ñayiu ñuu nani Tesalónica*

<sup>1</sup> Mee-da, Spalu, kidava'a-da carta ya'a xi'in Silvanu xi'in Timoteo. Ka kidava'a-da nuu mee-n ka kuu ñayiu ka jandixa Jesucristu ñuu nani Tesalónica. Ka kunduu-n xi'in Taa-ro Ianyuux xi'in Xto'o-ro Jesucristu. Na taxi-ia xamani-ia nuu-n, na kada-ia xa kutuu va'a koio-n.

### *Ka kuu mee-n #n ichi kane'e katn# ntdaa ñayiu*

<sup>2</sup> Ntdaa kiu ka xia'an-da xa n-kuta'u-da nuu Ianyuux xaxe'e ntdaa mee-n. Ka naja'an ña'a-da, hora ka xijan ta'u-da nuu-ia. <sup>3</sup> Kiu xi'in kiu, ka naja'an ña'a-da nuu Ianyuux. Taa-ro kuu-ia. Ka naja'an ña'a-da, xa ka kida-n xava'a, xaxe'e xa ka jandixa-n Xto'o-ro Jesucristu. Ka naja'an ña'a-da, xa yo va'a kidatniu-n, xaxe'e xa ka xemani-n Ianyuux xi'in ñayiu. Ka naja'an ña'a-da, xa ka kundee ini-n, xaxe'e xa xndetu-n xa ndixi Xto'o-ro Jesucristu. <sup>4</sup> Ñani-da ku'a-da, xemani ña'a Ianyuux mee-n. Ka xini-da xa n-kaxí ña'a-ia mee-n. <sup>5</sup> Na n-ka kachitnu'u-da tnu'u va'a Jesucristu, ña n-kachitnu'u-da tnu'u du'a ni. N-taxnuni Ianyuux nuu-da, te du'a n-ka kachitnu'u-da. N-kidatniu Espíritu Ii anu-n, xa kutnuni ini koio-n xa ka ja'an-da xandaa. Va'a ka xini-n xa n-xo tuu-da xi'in-n xaxe'e xa xemani ña'a-da.

<sup>6</sup> N-ka kida mee-n, ná n-ka kida mee-da, te ná n-kida Xto'o-ro Jesucristu. Juini yo kue'e vida n-ka ya'a-n, xaxe'e xa n-ka jandixa-n tnu'u

n-kachitnu'u-da, ko dani n-ka xeka va'a-n tnu'u jan. Te n-kida Espíritu Ii xa kuvete koio-n xa kuvete koio-n. <sup>7</sup> Te du'a, n-ka kuu mee-n ñn ichi kane'e katniñ ntdaa ñayiu ka jandixa Jesucristu, distrito Macedonia xi'in distrito Acaya. <sup>8</sup> Xaxe'e mee-n, xá n-ka tekú ñayiu Macedonia, xi'in ñayiu Acaya, xi'in ñayiu ntdaa ñnka ñuu, tnu'u Xto'o-ro Jesucristu. Ntdaa ñuu xá n-ka tekú ñayiu xa ka jandixa mee-n Ianyuux. Xijan kuu xa, ña ndoñu'u ka xa ja'an koio mee-da ni ñn. <sup>9</sup> Ka ja'an mee-i xa n-ka xitoni'ni ña'a-da mee-n te n-ka xeka va'a ña'a-n. Ka ja'an-i xa n-ka dandoo-n santu, xa kunduu koio-n xi'in Ianyuux Ndito. Ianyuux ndaa kuu-ia. <sup>10</sup> Diuni ka ja'an-i xa xndetu-n xa ndixi Da'ya Yi Ianyuux nde andiu. N-kida Ianyuux xa n-nandoto Jesús nuu n-kuu-ia ndiyi, te dakaku ña'a Jesús mee-ro, hora ndunde'e Ianyuux nuu ñayiu ñuñayiu.

## 2

*Va'a xna'a-n nax n-kida-da, na n-xo tuu-da xi'in-n Tesalónica*

<sup>1</sup> Ñani-da ku'a-da, ka xini-n xa ñatu n-ka xitoni'ni ña'a du'a-da. <sup>2</sup> Ka xini-n xa yo kue'e vida n-ka ya'a-da ñuu nani Filipos, te yo kui'a n-ka ja'an ñayiu ijan. Te juini du'a n-kuu, ko n-ka jandixa-da xa ñunuu ña'a na'i Ianyuux, te ña n-ka yu'u-da xa juña tnu'u ka-da tnu'u-ia nuu ñayiu. Xijan kuu xa n-ka xee-da ñuu-n, te nini kue'e vida ka ya'a-da, n-ka kachitnu'u-da tnu'u va'a Ianyuux nuu mee-n tuku. <sup>3</sup> Meni xa kuu xandaa n-ja'an-da. Ña n-ka kida-da xa u'u nuu-n, ña n-ka danda'u ña'a-da.

<sup>4</sup> N-xitotnuni ña'a Ianyuux mee-da. N-xio-ia confianza nuu-da, xa juña tnu'u koio-da tnu'u va'a Jesucristu nuu ñayiu. Te du'a ka ja'an-da. Ñatu ka ja'an-da, xa kada-da xa tna ini koio ñayiu, ka ja'an-da, xa kada-da xa tna ini Ianyuux. Xitotnuni mee-ia anu-da, na'a-ia ntdaa xa ka kida-da, xi'in ntdaa xa xani ini-da. <sup>5</sup> Ka xini-n xa nuncas ña n-ka xetniu-da tnu'u vidi xa ni'i ña'a-da, te nuncas ña n-ka danda'u ña'a-da xa ni'i koio-da tvini. Na'a Ianyuux xa du'a n-kuu. <sup>6</sup> Nuncas ña n-ka nduku-da xa koo koio ñayiu xañu'u nuu mee-da. Ni mee-n, ni inka ñayiu. Se n-tunda'a ña'a Cristu ka kuu-da, te kua'a xa kada-da xa koo koio-n xañu'u nuu-da. <sup>7</sup> Ko ñatu du'a ka kida-da. N-ka xemani ña'a-da. Nani ñunuu va'a ñin ñadi'i da'ya yijin-ña, dani n-xo ñunuu ña'a mee-da mee-n. <sup>8</sup> Xaxe'e xa ka xemani ña'a-da, n-ka kachitnu'u-da tnu'u va'a Ianyuux. Te nux n-ndoñu'u n-kuu, te n-xio anu-da xa kuú koio-da xaxe'e-n. Chi n-xee xa yo ka xemani ña'a-da. <sup>9</sup> Ñani-da ku'a-da, naja'an koio-n nanda n-ka kidatniu-da. Xna'a-n xa kue'e vida n-ka ya'a-da xa kutuu-da xi'in-n. Nduu, xakuua n-ka kidatniu-da, chi ña n-ka juini-da xa datnaña'a-da ñini n-ka kachitnu'u-da tnu'u va'a Ianyuux.

<sup>10</sup> Kua'a mee-n xa ja'an ndaa koio-n xaxe'e-da, te na'a Ianyuux du, ntdaa xa n-ka kida-da, ñini n-ka xo tuu-da xi'in mee-n, ñayiu ka jandixa Jesucristu. Meni xa juini Ianyuux n-ka kida-da, n-ka kida-da xava'a. Ni ñin ñayiu ña kua'a xa tekuechi ña'a-i. <sup>11</sup> Ka xini-n xa n-ka ja'an-da nuu ñin ñin-n nani ja'an ñin taa nuu da'ya-s. N-ka dakua'a ña'a-da, te n-ka taxi-da tnu'u kanu ini. <sup>12</sup> Yo kue'e n-ka xijan-da nuu-n, xa dandoo koio-n kuechi-n, te

kada koio-n ntdaa xa juini Ianyuux. Chi ja'an ña'a-ia, xa kutuu koio mee-n nuu taxnuni-ia, te jini koio-n xa Ia kunxa'nu ka kuu-ia.

<sup>13</sup> Xijan kuu xa, kiu xi'in kiu, ka xia'an-da xa n-kuta'u-da nuu Ianyuux. N-ka xeka va'a-n tnu'u Ianyuux, na n-ka tekun tnu'u jan, hora n-ka kachitnu'u-da. N-ka kutnuni ini-n xa tnu'u jan ñatu kuu tnu'u seyii, n-ka kutnuni ini-n xa xandaa xa tnu'u Ianyuux kuu. Te kidatniu tnu'u jan anu ñayiu ka jandixa Ianyuux. <sup>14</sup> Ñani-da ku'a-da, n-ka kida mee-n ná n-ka kida ñayiu ka jandixa Ianyuux distrito nani Judea. Mee-i tuku, ka kunduu-i xi'in Cristu Jesús. Ná n-ka ya'a mee-i kue'e vida, xaxe'e xa n-ka xini u'u ña'a ñayiu Israel, da n-ka ya'a mee-n kue'e vida, xaxe'e xa ka xini u'u ña'a ñayiu ñuu-n. <sup>15</sup> N-ka xa'ni ñayiu Israel Xto'o-ro Jesús, nani n-ka xa'ni-i se n-ka xian tnu'u tnu'u Ianyuux nuu ñayiu xá n-kuu kue'e kuia. N-ka xijun ña'a ñayiu Israel mee-da tuku. Dani ka kida-i xa ña tna ini Ianyuux, te dani jantna'a-i xi'in ntdaa ñayiu. <sup>16</sup> Ka juini-da xa juña tnu'u-da tnu'u va'a Ianyuux nuu ñayiu ña ka kuu ñayiu Israel, xa ma kuú koio-i xi'in kuechi-i, ko ña ka xejoon ñayiu Israel. Kiu xi'in kiu, ka kida ka ñayiu Israel kuechi. Ko vitna, xa n-xee hora xa ndunde'e Ianyuux nuu mee-i.

### *Kukajan ini-da xa jini ña'a-da inka vuelta*

<sup>17</sup> Ñani-da ku'a-da, ka kuu-da ná kuu in ñadi'i hora n-xi'i da'ya-ña. Juini ita'u ni kiu ña yoo ka-da xi'in-n, ko yo kukajan ini-da xa jini ña'a-da.

<sup>18</sup> Mee-da, Spalu, kue'e vuelta n-juini-da xa xee-da ñuu-n, ko ña n-xejoon kui'na xa xee-da.

<sup>19</sup> Xndetu-da hora ndixi Xto'o-ro Jesucristu, chi

hora ijan, kunujuuin va'a koio mee-n nuu mee-ia, te kuvete-da xa kuvete-da xaxe'e-n. Kuu ná kuu xa ni'i-da corona, te najuen tnu'u-da xa najuen tnu'u-da xaxe'e-n. <sup>20</sup> Mee-n ka kida xa ka xia'an-da xa n-kuta'u-da nuu Ianyuux. Mee-n ka kida xa kuvete-da xa kuvete-da.

### 3

<sup>1</sup> Ña n-kundee ini-da xa tekutnu'u koio-da nanda xtuu-n. Xijan kuu xa n-ka xani ini-da xa vatuka xa ndoo meni mee-da ñuu nani Atenas. <sup>2</sup> Te n-ka tunda'a-da Timoteo nuu-n. Ñani-ro kuu-si, se xinokuechi nuu Ianyuux kuu-s. N-kidatniu-s xi'in-da, xa juña tnu'u-s tnu'u va'a Cristu nuu ñayiu. N-ka tunda'a-da-si, xa chindee ña'a-s mee-n, xa kundee ini koio-n, xa jandixa na'i koio-n Xto'o-ro Jesús. <sup>3</sup> Ña n-ka juini-da xa dandoo koio-n ni ñn-n Cristu, hora ka xini u'u ña'a ñayiu ña ka jandixa Cristu. Va'a ka xini-n xa io xa du'a ya'a-ro. <sup>4</sup> Na n-ka xo tuu ka-da xi'in-n, n-ka ja'an-da xa io xa kue'e vida ya'a-ro, xaxe'e xa jandixa-ro Jesu-cristu, te du'a kuu, nani xna'a-n. <sup>5</sup> Ña n-kundee ka ini-da xa jini-da nanda xtuu-n. Xijan kuu xa n-tunda'a-da Timoteo, xa kanetnu'u-s tnu'u mee-n ndixi, nux dani ka jandixa-n Xto'o-ro Jesu-cristu. N-yu'u-da, xa nada kadajuexa ña'a kui'na mee-n, te ma kunduu koio ka-n xi'in Cristu. N-juini-da xa jini-da nux dani xiniñu'u tniu n-ka kida-da xaxe'e-n.

<sup>6</sup> Ko vitna, xa n-xee Timoteo ya'a. Tnu'u va'a ne'e-s n-nxee. Ja'an-s xa dani ka jandixa-n Jesu-cristu, te va'a ka xemani-n Ianyuux xi'in ñayiu. Ja'an-si xa ntdaa kiu ka naja'an ña'a-n, te ka juini-n xa jini ña'a koio-n, nani ka juini mee-da xa jini

ña'a-da mee-n. <sup>7</sup> Ñani-da ku'a-da, juini ka xini u'u ña'a ñayiu, te kue'e vida ka ya'a-n, ko kuka'nu anu-da, xaxe'e xa n-ka tekuda xa ka jandixa na'i ka-n Jesucristu. <sup>8</sup> Xaxe'e xa ka kundee ini-n xa kunduu na'i koio ka-n xi'in Xto'o-ro Jesús, te du'a kuu xa xtuu va'a mee-da. <sup>9</sup> ¿Nanda kua'a xa nachiya'u koio-da nuu Ianyuux? Ka xia'an-da xa ka xia'an-da xa n-kuta'u-da nuu-ia, xaxe'e mee-n. Kuvete-da xa kuvete-da nuu Ianyuux. Ia jandixa-ro kuu-ia. <sup>10</sup> Nduu, xakuaa ka xijan ta'u-da nuu Ianyuux xaxe'e-n. Yo kue'e ka xijan ta'u-da, xa nanitna'a nuu-ro mee-n xi'in mee-da. Ka juini-da xa chindee ña'a-da, xaxe'e xa ndoñu'u ka-n, xa jandixa va'a koio ka-n Ianyuux.

<sup>11</sup> Na kada Ianyuux xa nanitna'a nuu-ro inka vuelta. Na chindee ña'a Taa-ro Ianyuux xi'in Xto'o-ro Jesús, xa kotoni'ni ña'a-da. <sup>12</sup> Na kada Xto'o-ro Jesús xa juemani tna'a koio-n xa juemani tna'a koio ka-n, ñin-n xi'in ika-n. Na kada-ia xa juemani koio-n ntdaa ñayiu. Na kada-ia xa juemani tna'a koio mee-n, ná ka xemani ña'a mee-da mee-n. <sup>13</sup> Na kada Xto'o-ro Jesús xa kundee ini koio-n. Ndixi-ia, xi'in ntdaa ñayiu n-kida diin-ia xa ku kuu koio-i ñayiu mee-ia. Na ndixi-ia, te kunujuiin koio mee-n nuu Ianyuux. Ianyuux jandixa-ro kuu-ia. Taa-ro Ianyuux kuu-ia. Na kada Xto'o-ro Jesús xa kada koio-n xa juini Ianyuux, na kada-ia xa hora ijan ni, ni ñin ñayiu ma kua'a xa tekuechi ña'a-i nuu mee-ia.

## 4

*Xa tna ini Ianyuux*

<sup>1</sup> Ñani-da ku'a-da, vitna, xaxe'e xa ka kunduu mee-da xi'in Xto'o-ro Jesús, ka xijan-da nuu mee-n xa kada koio-n xa juini lanyuux. Xá n-ka dakua'a ña'a-da nax kada koio-n xa kada-n xa tna ini lanyuux, te du'a ka kida-n. Ka xijan-da nuu-n xa du'a kada koio ka-n.

<sup>2</sup> Va'a ka xini-n tnu'u ta'u tniu n-ka taxi-da. Te ka xini-n xa n-ta'u tniu Xto'o-ro Jesús mee-da, xa du'a dakua'a ña'a koio-da mee-n. <sup>3</sup> N-kida dñin ña'a lanyuux mee-ro, xa ku kuu-ro ñayiu mee-ia. Juini-ia xa kada koio-n xa juini mee-ia, juini-ia xa maxku kada koio ka-n xa u'u. Juini-ia xa maxku kidi-n xi'in ñayiu ñatu n-tnunda'a xi'in-n. <sup>4</sup> Ñani-da, juini-ia xa tnunda'a-n xi'in ñadi'i n-taxi-ia, te koo-n xañu'u nuu-ña, te juemani-n-ña. Ku'a-da, juini-ia xa tnunda'a-n xi'inseyii n-taxi-ia, te koo-n xañu'u nuu-s, te juemani-n-si. <sup>5</sup> Seyii, juini-ia xa maxku juejoon-n nuu yiki kuñu-n xa kukajan ini-n kue'e ñadi'i, ná ka kida ñayiu ña ka xini lanyuux. Ñadi'i, juini-ia xa maxku juejoon-n nuu yiki kuñu-n xa kukajan ini-n kue'e seyii, ná ka kida ñayiu ña kaxini lanyuux. <sup>6</sup> Ñani-da, maxku danda'u-n inka seyii, xa kidi-n xi'in ñadi'i-s. Ku'a-da, maxku danda'u-n inka ñadi'i, xa kidi-n xi'in yii-ña. Na n-xo tuu-da xi'in-n, n-ka ja'an-da xa kada u'u ña'a lanyuux mee-n, nux du'a ka kida-n. <sup>7</sup> Ña n-ja'an ña'a-ia xa ku kuu-ro ñayiu ka kida xa juini mee-ro, n-ja'an ña'a-ia xa ku kuu-ro ñayiu ka kida xa juini mee-ia. <sup>8</sup> Xijan kuu xa, ñin ñayiu, nux ña xe ini-i xa n-ka dakua'a-da, du'a kuu xa ña xe ini-i xa n-ja'an lanyuux. Ña kuu xa ñatu jandixa-i ñin ñayiu, kuu xa ñatu jandixa-i lanyuux n-taxi Espíritu Ii.

9 Ña ndoñu'u xa kadava'a-da nuu-n xa io xa juemani tna'a-n, chi xa n-dakua'a ña'a lanyuux xa juemani tna'a-n, ñn-n nuu ñnka-n. 10 Ndaa xa ka xemani-n ntdaa ñani-ro ku'a-ro nitu'u distrito Macedonia. Ko ñani-da ku'a-da, ka xijan-da xa juemani-n xa juemani ka-n-yi. 11 Ka xijan-da xa kutuu mani koio-n xi'in ntdaa ñayiu. Kada-n, ñn ñn-n, tniu mee-n. Xi'in nda'a-n kadatniu koio-n. Du'a xá n-ka ta'u tniu-da, na n-ka xo tuu-da xi'in-n. 12 Nux du'a kada-n, ñn ñn-n, nde ñayiu ña ka jandixa Xto'o-ro Jesús koo koio xañu'u nuu-n. Te ma ndoñu'u xa kundeka ña'a ni ñn ñayiu.

### *Ndixi Xto'o-ro Jesucristu*

13 Ñani-da ku'a-da, ka juini-da xa kutnuni ini koio-n nanda kutuu ñani-ro ku'a-ro n-ka xi'í. Ña ndoñu'u xa tñau ini koio mee-n, ná tñau ini ñnka ñayiu. Chi mee-i, ña tuu na confianza io-i nuu lanyuux. 14 Ko mee-ro, jandixa-ro xa n-xi'í Jesús te n-nandoto-ia. Diuni jandixa-ro xa nadandoto lanyuux ntdaa ñayiu n-ka jandixa Jesús antecas xa kuú-i, te ndixi uun ka-i xi'in Jesús hora na ndixi-ia.

15 Tnu'u Xto'o-ro Jesús ka ja'an-da nuu-n. Juini dani xndito-ro te xtuu na'i-ro ñuñayiu hora na ndixi Jesús, ko ma juin ndodo nuu mee-ro nuu ñani-ro ku'a-ro xá n-ka xi'í. 16 Hora ijan kunde'a-ro Xto'o-ro Jesús vax nuu-ia nde andiu. Kana xee-ia tnu'u ta'u tniu-ia. Te kana ángel kunxa'nu ka, ia xinokuechi nuu lanyuux. Te nda'i trompeta lanyuux. Te ki'na nuu nandoto koio ñani-ro ku'a-ro n-ka jandixa Jesús antecas xa kuú-i. 17 Te dada mee-ro, ñayiu xtuu na'i ka ñuñayiu. Tñi ña'a lanyuux, te kandeka ña'a-ia ntdaa-ro jñin nuu vikó, xa nanitna'a-ro xi'in Xto'o-ro Jesús nuu



dujun ka. Te du'a kutuu va'a-ro, ntdaa-ro, xi'in Xto'o-ro Jesús kuia ma jin ndi'i. <sup>18</sup> Xijan kuu xa, xi'in tnu'u ya'a, juña'a tna'a-n tnu'u kanu ini, ñin-n nuu inka-n.

## 5

<sup>1</sup> Ñani-da ku'a-da, ña ndoñu'u-n xa ja'an koio-da nada kuia ya'a-ro, antecas xa ndixi Xto'o-ro Jesús. Ña ndoñu'u-n xa ja'an-da nax koo, antecas xa ndixi-ia. Du'a ma kadava'a-da nuu-n. <sup>2</sup> Va'a xna'a mee-n xa danaa xee kiu ndadandaa Xto'o-ro Jesús ntdaa xa io. Xna'a-n xa xee kiu ijan, ná xee ñin ñadu'u xakuaa. <sup>3</sup> Hora ka ja'an ñayiu: “Xtuu va'a-ro, ña tuu nax kuu”, te danaa, hora ijan ni, danaa lanyuux ñayiu jan. Ná kuu xa danaa ni kixe'e xa xaxia'an hora kaku da'ya ñin ñadi'i, da kixe'e lanyuux xa danaa-ia ñayiu jan. Te mayo-i kaku. <sup>4</sup> Ko mee-n, ñani-da ku'a-da, ñatu ka xika-n nuu nee, xa na'i xee kiu ijan, ná na'i kiu ñin ñadu'u ñin ve'e. <sup>5</sup> Ka kuu mee-n, ntdaa-n, ñayiu ka jandixa Xto'o-ro Jesús. Ka xika-n nuu kanda va'a. Ñatu kuu-ro ñayiu xakuaa, ña ka xika-ro nuu nee. <sup>6</sup> Ná kuu ñayiu ka kidi kuu ñayiu jan. Xijan kuu xa maxku kidi mee-ro, ná ka kidi mee-i. Na kunde'a-ro xa ndixi-ia. <sup>7</sup> Ñayiu kidi, kidi-i xakuaa, ñayiu xini, xini-i xakuaa. <sup>8</sup> Ñayiu ka xika nduu kuu-ro. Io xa koo tu'a-ro. Ná kuu soldado kuu-ro, te io xa dada'u ña'a. Ná kuu xa dada'u soldado pechu-s, kuu xa jandixa-ro lanyuux te xemani-ro ñayiu. Ná kuu xa dada'u soldado diki-s, kuu xa xndetu-ro xa dakaku ña'a Xto'o-ro Jesucristu, xa kutuu va'a-ro xi'in-ia. <sup>9</sup> Chi ña n-nduku ña'a lanyuux mee-ro, xa kada u'u ña'a-ia. N-nduku

ña'a-ia, xa ni'i-ro xa kutuu va'a-ro xi'in mee-ia, xaxe'e Xto'o-ro Jesucristu. <sup>10</sup> N-xi'í Jesucristu xaxe'e-ro, te juini ndito-ro o n-xi'í-ro, ko dani kutuu-ro xi'in-ia. <sup>11</sup> Xijan kuu xa, juña'a tna'a-n tnu'u kanu ini, te chindee tna'a-n xa kundee ini koio-n. Nani ka kida-n vitna, dani kada koio ka-n.

*Ñani-da ku'a-da, io xa du'a kada koio ka-n*

<sup>12</sup> Ñani-da ku'a-da, ka xijan-da xa koo koio-n xañu'u nuu se ka kidatniu xi'in-n. N-kaxí Xto'o-ro Jesús mee-si, xa taxnuni koio-s nuu-n, te dakua'a ña'a-s. <sup>13</sup> Koo koio-n xañu'u nuu-s, te yo va'a juemani koio-n-si, xaxe'e tniu ka kida-si. Te kutuu mani-n, ntdaa-n, ñn-n xi'in ika-n.

<sup>14</sup> Ñani-da ku'a-da, ka xijan-da nuu-n, xa du'a kada koio-n. Kudeen koio-n nuu ñayiu ña ka juini xa kadatniu-i. Juña'a koio-n tnu'u kanu ini nuu ñayiu ka yu'u. Chindee koio-n ñayiu ña ndaku. Kundetu kuee koio-n nuu ntdaa ñayiu.

<sup>15</sup> Kunde'a tna'a-n, xa ni ñn-n maxku kada xa u'u nuu ñayiu ka kida xa u'u nuu mee-n. Kada koio-n xava'a, nani nuu ntna'a mee-n, dani nuu ntdaa ñayiu.

<sup>16</sup> Ntdaa kiu kuvete koio-n. <sup>17</sup> Kiu xi'in kiu, kajan ta'u koio-n nuu Ianyuux. <sup>18</sup> Hora kuvete-n, hora tnau ini-n, dava'a nga xa ya'a-n, ko juña'a koio-n xa n-kuta'u-n nuu Ianyuux. Du'a kunduu na'i ka-n xi'in Cristu Jesús, te du'a kada-n xa juini Ianyuux xaxe'e-n.

<sup>19</sup> Ná kuu ñn ñu'u koko kidatniu anu-n, da kuu Espíritu Ianyuux. Juejoon koio-n, ñn ñn-n, xa kadatniu ka-ia. <sup>20</sup> Nux kachitnu'u ñn ñayiu tnu'u Ianyuux nuu-n, te io xa chinuu koio-n tnu'u jan.

<sup>21</sup> Kototnuni koio-n ntdaa xa tekun, te kueka va'a

koio-n xa kuu xava'a. <sup>22</sup> Dandoo koio-n ntdaa xa kuu xa u'u.

<sup>23</sup> Kida Ianyuux xa kutuu va'a-ro. Xá n-ja'an ña'a-ia mee-ro xa ku kuu-ro ñayiu mee-ia, xá n-kida diin ña'a-ia. Na kada-ia xa kada koio mee-n ntdaa xa juini mee-ia. Na kuneva'a ña'a-ia mee-n, anu-n xi'in xaxtnuni-n xi'in yiki kuñu-n, xa ma kua'a xa tekuechi ña'a ni in, hora ndixi Xto'o-ro Jesucristu. <sup>24</sup> Ja'an ña'a Ianyuux mee-n xa kutuu va'a koio-n xi'in-ia, te du'a koo. Kua'a-ro xa koo koio-ro confianza nuu-ia, xa du'a kada-ia.

### *Xanyuux nuu-n*

<sup>25</sup> Ñani-da ku'a-da, kajan ta'u koio-n nuu Ianyuux xaxe'e mee-da.

<sup>26</sup> Juña'a koio-n xa ndajan tnu'u-da ntdaa ñani-ro ku'a-ro xtuu ijan.

<sup>27</sup> Xaxe'e xa ta'u tniu ña'a Xto'o-ro Jesucristu mee-da, ka ta'u tniu ña'a mee-da mee-n, xa ka'u koio-n carta ya'a nuu ntdaa ñani-ro ku'a-ro xtuu ijan.

<sup>28</sup> Na taxi Xto'o-ro Jesucristu xamani-ia nuu-n. Du'a na koo.

**Tnu'u va'a tnu'u Jesucristo**  
**New Testament in Mixtec, Diuxi-tilantongo**  
**(MX:xtd:Mixtec, Diuxi-tilantongo)**

copyright © 2001 Wycliffe Bible Translators, Inc.

Language: Mixtec, Diuxi-tilantongo

Translation by: Wycliffe Bible Translators, Inc.

Mixteco, Diuxi y Tilantongo [xtd], Mexico

**Copyright Information**

© 2001, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Diuxi-tilantongo

**© 2001, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 22 Feb 2024 from source files  
dated 29 Jan 2022

601f9a87-70f6-56f7-8175-fc2dac9c9f9a